

欽定剿平粵匪方略

欽定勦平粵匪方略卷九十八 甲寅年

七月初二日 己亥 僧格林沁奏言連日天色開霽

運河水勢漸平而決口之水仍然汎濫漫流現在趕緊設法修築河隄嚴催委員將四面套隄築固以利圍勦而防水患又恐該逆趁水遠颺復經雇覓小船派撥官兵往來游弋晝夜梭巡該逆被圍情急時思潰竄連次乘夜出巢窺伺

均經官兵擊退六月二十八日夜風雨大作該  
逆乘筏梟水向東面撲來勢極猖獗奔至濠牆  
經慶祺明慶綸副舒保巴揚阿等督兵極力截  
勦斃賊無數餘匪紛紛落水次日由決口漂出  
帶箭著槍賊屍一百餘具我兵陣亡官一員兵  
十名受傷官兵十四名其陣亡之黑龍江正黃  
旗驍騎校委參領伊郎阿應請

飭部照例議卹目下連鎮軍營形勢利在速戰今臣挑  
濠築隄作此緩圖者因該逆百戰之餘狡猾異  
常動輒潛匿死拒每遇合力併攻賊壘我兵多  
有傷亡徒折精銳兩月以來設法誘引無計不  
施臣及各營統帶不論風雨日夜隨時前往督  
視實未敢稍耽安逸惟有籲懇

皇上逾格天恩寬予時日容臣趕緊圖功以贖咎戾奏

上命軍機大臣傳諭僧格林沁曰覽本日所奏逆衆夜乘風雨奔撲東南面濠牆雖經我兵擊退斃賊並不甚多且弁兵亦有傷亡攻勦仍不得手該逆圍困日久必思逃遁我兵盡在西北一帶東南兩面本覺空虛儘有疏虞官兵爲水所阻更恐顧此失彼著僧格林沁熟籌妥辦計出萬全或移營逼近賊巢以便堵

擊或設法誘出痛加勦洗如再不能速戰滅此窮寇  
但欲懇恩寬予時日朕必治該大臣以耽延之罪

上諭內閣曰此次擊賊獲勝該大臣等務卽督兵趕緊  
圍攻速將此股逆匪全數殲除陣亡之黑龍江正黃  
旗驍騎校委參領伊郎阿著交部照例議卹

同日台湧奏言查阜市一帶賊衆約二千餘人  
盤踞臣以遊擊平海葉永泰等所帶兵勇一千

名交署提督佈克慎帶往勦賊接據該署提督  
報稱初六日馳抵應城縣十一日統率弁兵列  
爲三隊進勦甫至距縣城三十里之陳家嶺地  
方阜市賊匪七八百人迎面抗拒都司董玉龍  
所帶頭隊官兵正與相值槍礮齊施殺斃賊匪  
二百餘名生擒長髮賊目唐當潰等二名餘賊  
敗逃平海等所帶中隊後隊官兵同時趕到追

殺由陳家河直抵阜市生擒賊匪六名擊斃多名撲水淹斃者無數打翻賊船十餘隻該署提督復親率平海等沿湖搜捕隨將賊船焚燬阜市一律肅清該署提督統帶各路官兵仍折赴應城聽候調度又接據遊擊吳登鼈都司劉富成稟報該遊擊等自馳抵長江埠後覓獲划船七十餘隻探知湖內郎豬橋一帶藏有賊船百餘



雙停泊欲往阜市接應當卽督帶兵勇分坐划  
船前往勦捕行抵該處逆匪駛出迎敵兵勇槍  
礮齊發打沈賊船十餘隻逆始退竄兵勇飛槳  
趕上燒燬賊船二十餘隻斃匪數十名生擒長  
髮賊趙義發等十六名餘匪逃散該遊擊等仍  
帶兵勇回紮長江埠以便添備船隻進勦等情  
臣查此股賊匪旣滅則西南由湖出河一帶自

可漸次疏通一俟船隻稍敷卽當渡出澗口進  
攻其東南陸路臣前已咨催舒倫保桂明各督  
所統官兵迅趨楊店雙廟澗口步步相機進剿  
茲舒倫保於十一日始自應山拔營十三日行  
至小河十六日行至距楊店十五里之盧官店  
屯紮距雙廟尙隔七十五里桂明經臣咨催於  
十七日始自德安起程十八日行至孝感十九

日行至楊店之四里廟屯紮距灑口尙隔一百  
四里均未能扼要堵截臣現又恭錄

諭旨分別咨催前進

同日湖北巡撫兼署湖廣總督楊需奏言臣定  
於日內由信陽之平靖關先抵德安調集舒倫  
保台湧管帶之兵並催令佈克慎隨赴武昌速  
籌攻勦其阜市一帶應否改派桂門往勦以爲

後路容俟臣到德安後妥籌迅辦四川官兵應  
由何處徑達武昌臣已飛咨官文酌添荊州官  
兵就近設法飭令取道前進一面咨催塔齊布  
曾國藩督帶礮船接應一切調度布置統由臣  
到任後悉心分別籌畫總期併力進攻迅圖克  
復武漢均奏入

上命軍機大臣傳諭楊需曰本日據台湧奏阜市盤踞

之賊一律肅清長江埠續來賊船亦已擊散佈克慎督兵折赴應城該處距江口較近正可催令趕緊前進爲該撫先聲前有旨令舒倫保來京陛見並令台湧察看桂明如不得力卽行叅奏本日台湧摺內並未遵辦但稱舒倫保於十一日拔營十六日始抵盧官店距雙廟驛尙有七十五里桂明於十七日起程十九日始抵四里廟距灑口尙有一百四里現在飛

催等語湖北軍情急如星火若皆似此耽延豈非有心貽誤楊需旣由德安一帶赴任應如何布置卽著節節妥籌以速爲妙台湧仍著嚴催前進不准以聽候調度爲詞任意株待佈克慎亦不准藉詞折回舒倫保桂明果係有意逗留卽著查明據實嚴叅武昌省城文武下落仍著確查具奏

初四日

辛丑

向榮奏言查四川征兵共五千餘名

分攻江鎮上海三處去夏歸將軍蘇布通阿統領以虎嵩林明安泰瑞格三人幫同分帶現在虎嵩林督兵調往上海瑞格奉

旨飭赴太原鎮升任僅明安泰分領川東官兵一千名其餘盡係蘇布通阿一人統帶蘇布通阿又奉旨實授江甯將軍勢難兼顧所有四川征兵亟應豫籌管帶之人相應請

旨飭下四川督臣就該省實缺鎮將內揀選明練總兵  
一員副參一二員前來軍營幫同分帶以利攻  
勦奏入

上命軍機大臣傳諭裕瑞曰向榮奏管帶川兵乏員請  
飭選派鎮將赴營等語著裕瑞卽於該省實缺鎮將  
內揀選明練得力之總兵副將二三員馳往向榮軍  
營聽候調遣



向榮又奏言再臣所帶川黔楚粵官兵皆從征  
四五年其中有疲乏傷病者隨時驗明汰除募  
補新兵責令各營訓練管束其有藉詞巧避甚  
至擅離營盤者經臣查拏重辦或卽正法以儆  
效尤間有遠去無蹤各行各省通緝總未據報  
獲一名現當勦逆緊要之時營伍關繫至重若  
不認真究治誠恐此風一開必致相率潛逃相

應請

旨飭部分飭各直省地方官遇有軍營吞緝逃兵一體  
嚴密查拏就地正法以肅戎政奏入

上諭內閣曰向榮奏請飭各直省嚴緝逃兵等語軍營  
兵丁擅離營盤甚至私行逃脫於行軍紀律大有關  
繫著各直省將軍督撫府尹遇有各路軍營吞拏逃  
兵卽照單開年貌趕緊緝拏務獲就地卽行正法毋

任漏網以肅戎行

同日駱秉章奏言查逆賊自五月十三日竄陷  
龍陽後賊船由滄港白沙市駛進十五日攻撲  
常德府城十六日午刻城陷知府景星副將富  
勒敦遇害臣飛催遊擊周鳳山都司李輔朝星  
速帶勇先進二十五二十七等日周鳳山等行  
抵龍陽賊船百餘隻飛駛前來上下分泊陸路

賊匪從後繞撲營盤周鳳山李輔朝督勇分路  
鏖戰轟斃賊匪百數十名奪獲賊船二十餘隻  
賊船敗潰駛回二十八二十九等日大雨如注  
湖水驟長丈餘營盤被水淹浸六月初一日賊  
船二千餘隻乘漲直偪營盤三面開礮轟擊周  
鳳山等見勢難支持一面分隊拒戰一面覓路  
退回毓德鋪沿途野潦縱橫各勇鼻水徑過間

有溺斃軍裝頗有損失是日貴東道胡林翼帶  
黔勇由益陽馳抵毓德鋪詢知前途無船勢難  
飛渡決計從益陽馬家塘取道黃土店可由桃  
源武陵邊境直抵常德飭周鳳山等帶勇徑回  
益陽整理軍裝自帶黔勇斷後以防賊匪追襲  
初四日胡林翼帶勇先發周鳳山李輔朝隨同  
前進貴州參將閃雲統帶黔兵六百行抵辰州

已飛札會同胡林翼進剿臣伏思逆賊攻陷常德分踞岳州是全湖之險已爲該逆所踞雖中路進剿岳州之賊有署提臣塔齊布一軍西路進剿常德之賊有貴東道胡林翼一軍然祇能於陸路相機痛剿若賊匪上船官軍卽未免望洋興歎是制賊死命終非水軍莫濟前禮部侍郎臣曾國藩戰船修造甫畢廣西委員李孟羣

所募水勇千名甫經到省鎮臣陳輝龍所造淺水拖罟尙須旬日後始可完工臣與曾國藩悉心商議以目今賊勢而論常德賊船多於岳州情形較岳州更爲喫緊曾國藩現擬將水師分爲兩起一起由益陽龍陽直指常德遇賊卽剿一起稍後察看賊勢或合或分相機繼發務期與陸軍合力夾剿將兩城克復乘勢出江東下

被害之知府景星副將富勒敦應請

旨飭部照例議卹奏入

上命軍機大臣傳諭略乘章塔齊布曰略乘章奏賊船  
由滄港白沙市駛進五月十六日攻陷常德府城覽  
奏憤懣之至常德與岳州對峙重湖賊勢猖獗亟宜  
迅圖克復胡林翼旣由益陽取道黃土店自桃源武  
陵繞道前進著卽催令統領周鳳山李輔朝閃雲所



帶各兵勇迅速進剿圖復郡城毋得再有延誤湖北  
自省城失陷後援兵甚少賊勢方張尤爲喫緊著瘖  
齊布飛速統兵前進爲收復武昌之計並卽知照楊  
需兩路夾攻勿稍延緩曾國藩所帶戰船旣已修造  
竣事李孟羣所募水勇業經到省著卽催令曾國藩  
迅帶頭起師船進援常德與陸路兵勇合力夾擊迅  
將岳常兩郡收復乘勢進攻武漢毋稍延緩

上諭內閣曰逆匪攻陷常德府城所有被害之常德府知府景星副將富勒敦著該部照例議卹

略秉章又奏言署提臣塔齊布於五月二十日進兵大荆驛賊匪在新牆築土城三座扼要抗拒塔齊布飭都司普承堯由左守備彭三元由右親督兵勇由中分路進勦並飭中軍都司滕遇春將前隊兵勇進攻槍斃賊匪數十名連奪

賊營三座賊匪潰竄適兩路兵勇繼至塔齊布  
率勇緊追斃賊百餘名生擒長髮賊四十餘名  
奪獲賊船四十七隻此中路獲勝之情形也其  
由平江進剿崇通賊匪各軍自五月初九至二  
十九日大小十一戰據候選訓導江忠淑等疊  
次稟報統計共斃賊九百餘名生擒百餘名陣  
斬賊目陳姓金姓僞司馬吳姓等多名此東路

獲勝之情形也現在兩路相機進勦兵勇尙爲奮勉堪以仰慰

宸廑奏入報

聞

初八日乙巳官文貫陞奏言臣等查武漢爲合省根本重地荊州爲七省往來通衢逆賊旣詭計多端軍情更隨時變幻誠如

諭旨武漢之賊一日不盡則荊州一日不能安枕前探賊由洞庭湖直撲常德經官軍擊退復竄岳州致南北援兵均爲牽掣爲今之計欲復武昌必應先圖漢陽欲圖漢陽必由襄河一帶進兵前派總兵雙保帶領漢屯官兵一千五百餘員名由潛江縣渡襄河隨勦隨進因兵力過單又飭道員羅遵殿備船百隻專派兵勇會合川兵由

沔陽州之仙桃鎮漢陽縣之蔡店一路進剿以  
期直達漢陽並令探悉楊需帶兵來楚卽歸調  
遣又四川建昌鎮福忻所帶兵五百名前已由  
界溪橋孟家溪地方撤回虎渡口現探常德澧  
州賊皆下窺亦卽調往潛江作爲雙保後起接  
應所有岳州一路探聞曾國藩統帶礮船駐紮  
湘陰塔齊布帶兵在岳州上數十里紮營伏乞

飭催迅速前進臣等已撥川勇一千餘名駛駕礮船派  
同知銜李光榮等管帶在調弦口江面防堵相  
機協勦岳州庶荊州長沙聲氣亦可相通至監  
利縣與岳州一江之隔已飭同知銜張于銘帶  
勇五百名在監利屬尺八口地方沿江設防遙  
爲聲勢阻賊登岸復飭守備宗維清帶城守營  
兵一百四十餘名署監利縣知縣徐文灼等帶

勇六百名駐紮監利飭知縣吳振鏞等帶勇一  
千名速赴沔陽作協勦漢陽之計又守備鍾墉  
管帶練丁一千一百餘名前抵荆郡其練丁皆  
精壯可用當飭由沙市進規沔陽州城直達漢  
陽現在川兵川勇均經派往進勦武漢荆州防  
兵仍應分布要隘卽由臣貴陞率領副將王國  
才佟攀梅都司畢金科協領依西布等隨時相



機接應不致顧此失彼探聞前撫臣青麐涼州

副都統魁玉高州鎮總兵楊昌泗收集武昌潰  
散兵勇尙有數千名繞道已至長沙有來荆之  
說似未便任其置身事外且聞青麐素得兵心  
如果來荆擬仍令會同楊昌泗收集兵勇分路  
勦辦副都統魁玉整頓前帶旗兵作爲後隊務  
期厚集兵力早圖克復武漢以維大局奏入

上命軍機大臣傳諭官文貴陞曰據官文等奏賊撲常德經官兵擊退復竄岳州該將軍此摺係本月初二日拜發去常德失守之日已一月有餘何以官文等尙未得有確信殊不可解駱秉章前奏胡林翼周鳳山等由益陽取道黃土店直抵常德曾國藩亦由水路前進此後並未續報該將軍所稱常德澧州賊皆下竄究竟竄往何處亦未詳細敘明澧州與荊州連

界道路並非寫遠何以未將實在情形探明具奏該將軍所籌全局尙係爲圖勦武漢之計現在賊陷常德距荊州甚近該將軍務當體察緩急情形隨時設備一面確探賊匪是否尙踞常德抑係竄赴何路迅速奏聞楊需此時諒已馳赴湖北所有四川赴援兵勇卽可歸楊需調遣其荆襄一帶防守事宜卽責成官文貴陞實力督辦並與楊需隨時知照互相策應

相機布置據奏青麀魁玉楊昌泗收集潰兵數千名繞至長沙有來荆之說殊堪詫異青麀等兵潰後何以徑行遠赴長沙再來荆郡係由何路避走此信如果屬實著俟青麀等到荆後卽專摺迅速入奏聽候諭旨其所帶兵勇統歸官文等派員管帶台湧前在德安會因潰兵失事此等潰散兵勇本不足恃且恐與賊匪暗相勾結該將軍等務須悉心詳查分別去

留毋致再蹈前轍

同日和春福濟奏言臣等於六月十七日令各營合攻廬州十八日齊抵城下得勝門突出賊匪三四千人分三路來撲經音德布江忠濬程智泉督率兵勇分途迎勦斃賊無數適珠克登楊青鶴趕至得勝門與音德布等合兵會勦又斃賊百餘名逆匪敗退十九二十兩日督率各

營官兵攜帶攻城器具五鼓潛至城下兵勇蟻  
附而上守賊驚覺滾木擗石火箭火罐亂擲如  
雨未能登城二十一日仍帶各路官兵同時進  
取甫置雲梯又爲賊覺南門突出賊匪二三千  
人當令鄭魁士等帶領湖南宣化青州兵兩路  
夾擊斃賊不少維時音德布珠克登楊青鶴江  
忠濬程智泉攻打得勝大西水西各門開礮擊

死騎馬黃衣賊首二名匪退入城我兵追殺直抵城濠城上槍礮紛至卽行收隊其大小東門北門賊匿未出各官兵仍開礮對城轟擊是日之戰約斃賊匪七八百名二十六日臣等派副都統常清遊擊嵩瑞帶領兵勇於三更由水西門外紫金堦前進城外梅花樁節節密布兵勇攀樁抵城時已天曙旋爲大雨所阻二十九日

仍由紫金塹暗進又因有備而止伏思賊踞虜  
州自我軍移營進剿以來節次捨斬已逾萬名  
奪獲巢壘多處足以寒賊之膽祇以城大而堅  
圍剿愈緊防守愈嚴以致暗襲明攻總未得手  
臣等惟當殫竭血誠不遺餘力以冀克復堅城  
和春福濟又奏言提臣秦定三於六月十五日  
移紮距舒城二十里之白洋鋪十六日督兵在



連三橋一帶迎剿賊匪三面夾攻匪眾敗走生  
擒僞指揮徐從新一名正法奪獲旗槍多件約  
斃賊匪百餘名十七至二十七等日復於楊家  
店五里橋王家店等處疊獲勝仗斬馘甚多現  
已移營楊家店至三角井酌量前進臣等仍飭  
設法進攻迅圖克復奏入

上命軍機大臣傳諭和春福濟曰和春等奏連日攻剿

獲勝並勦辦舒城賊匪情形此次攻勦廬州逆匪惟  
十八二十一兩日殲斃賊匪尙多此外不過用礮轟  
擊我兵設計攻城均爲賊覺該提督等雖疊次獲勝  
而郡城未能卽時克復於攻勦事宜仍屬毫無把握  
秦定三攻勦舒城賊匪已移營楊家店至三角井該  
處是否逼近縣城我兵連次獲勝正可乘此聲威迅  
圖克復著和春福濟懷遵疊次諭旨督飭各路兵勇

剋日進攻斷不准以該逆堅守不出爲詞遷延時日致干重罪舒城賊匪並著秦定三嚴飭郝光甲等併力進攻其巢霍兩處賊匪擒匪仍飭催忠秦劉玉豹等趕緊勦辦以期漸次廓清毋稍延緩

同日勝保崇恩奏言伏查連鎮逆匪疊被大兵攻勦勢極窮蹙惟大雨時行河水漫溢深恐該逆乘隙南竄東省武定府屬地方緊與連鎮毗

連該郡爲東北門戶亟宜嚴密防範德平地方雖有藩司厲恩官帶兵駐守而兵勇僅一千名未能兼顧武定且該府知府錢汝楫奉

旨調補山西汾州府知府新補知府祁之鏐尙未到任該府防務現極喫緊又各屬疊獲奸細訊有窺探省城之供根本重地尤不容稍有疏虞臣崇恩自上年八月出省迄今將及一年省垣一切

籌防均未身親布置雖節經諄飭司道妥慎經理並令紳士管帶練勇在齊河紮營必須親往查看始可放心擬卽輕騎減從馳赴武定相機布置並便道進省詳審履勘鎮定人心所有臣崇恩現帶兵勇揀留一千一百名交兗州府知府葉圭書統帶會同參將定順遊擊玉山文英仍駐高唐聽候臣勝保調遣隨同進攻其餘兵

勇臣崇恩於七月初三日帶領啟行在省門迤  
北一帶扼要處所駐紮巡防若武郡需兵隨時  
調取亦非寫遠其德平一路仍飭厲恩百嚴督  
兵勇民團實力防剿俟臣崇恩至武定布置妥  
協後取道赴彼察看如有未盡機宜隨時變通  
辦理連鎮之賊儘向西南竄逸則德州較爲喫  
重臣等早經飭令督糧道姚錫華登萊青道張

鳳池督飭官兵於該州城廂及富馬營柘園鎮等處扼要防守似尙足資控制若該逆奔赴高唐臣勝保亦必設法抽撥官兵極力迎擊奏入

上命軍機大臣傳諭崇恩曰前因運河陡漲恐連鎮逆匪乘隙紛竄諭令崇恩於武定德平一帶嚴防茲據勝保崇恩奏稱崇恩現於本月初三日自高唐赴省布置再赴武定等語此時勦賊喫緊儻連鎮賊竄而

該撫轉迂道省城豈不有誤事機且高唐距省百有餘里一切事宜豈竟毫無聞見必須親往布置方可放心耶賊匪聲東擊西是其故智該撫豈可株守省垣致墮奸計著崇恩於到省查看後不准逗留卽速出省督兵擇要扼守所有山東與連鎮接壤地方均著飭屬一體嚴防至德州一路仍當隨時督飭姚錫華等小心防範以杜紛竄該撫當權衡緩急毋得避



難就易自干罪戾

十二日酉己琦善奏言查瓜州賊匪倚江爲固與

金陵鎮江爲犄角之勢非水陸夾攻無以截奔  
竄而斷應援自艇船壘勝金陵之援雖絕而瓜  
州鎮江兩處隔江相望仍復來往自如南北兩  
岸均有賊營礮隄中流金山又有賊壘瓜州大  
小兩口勢難停泊一經駛赴上游若欲回帆攻

勦又須俟西風之便未能控縱自如紅單船已  
抵上海經臣晝夜催提始由上海駛抵焦山連  
日西風大作逆風頂溜七月初一日風色漸轉  
卽飭陸路各營出隊與水軍併力夾擊由三汊  
河東西兩岸分路進攻行至四里鋪天尙未曉  
官兵分路進勦初二日黎明直至賊營頭道濠  
邊該逆施放大礮向外轟打匿不露面不得已

將兩岸官兵暫行撤至相距數里之四里鋪該  
逆突由兩岸竄出官兵之後我兵轉身迎擊賊  
卽敗回我兵分路進剿越過頭二兩道賊濠蘆  
葦伏賊羣起抗拒西岸賊營又竄出多人抵敵  
亦經官兵擊敗該逆屢敗屢進遊擊馬永泰張  
維義都司劉琮等將銅礮擺列轟斃賊匪數百  
名賊始敗入土城匿避不出東岸之賊經副將

鞠殿華督帶官兵擊斃數十名敗入甄城此七月初二日陸路接仗之情形也是日曙後東南風尙微都司陳國泰帶船二十五隻作爲頭起遊擊吳全美帶船二十五隻作爲二起復邀署京口副將張攀龍在陳國泰船上一同進攻至巳刻風力漸勁揚帆上駛陳國泰帶領船隻自北固山至金山進攻瓜州賊以大船十三隻攔

截大船之後以小船連搭浮橋幫同抗拒該都  
司招令各船銜尾前進逼近大口迴環連攻賊  
於船後及土城內施放大礮我船被礮無不洞  
穿兵勇頗有受傷者攻至未正不能得手維時  
遊擊吳全美率二起戰船繼進連燬金山礮臺  
乘勢進攻瓜州逼近賊隄攻打直至申正風色  
漸微已接仗四時之久暫且收隊令寄碇瓜州

上游江面再圖進取吳全美船隻經向榮專札  
催提已飭該員帶領紅單船二十五隻駛赴上  
游聽候調遣其陳國泰率帶船隻駐泊瓜州大  
口以上刻下東南風烈該船已駛過瓜州之西  
又須相機折下會攻奏入

上命軍機大臣傳諭琦善向榮曰我兵陸路攻勦瓜州  
仍未能即時克復覽奏實深焦急至紅單船駛入大

江初次與賊接仗雖銳意進攻尤願妥爲布置何以賊船僅十餘隻於船後及土城內施放大礮紅船卽被洞穿兵勇亦多受傷是否陳國泰帶領頭起船隻未能得力吳全美率二起戰船雖連燬金山礮臺偏近賊隄究竟斃賊多寡亦未詳敘琦善節制水軍務當實力督率斷不可任聽該遊擊吳全美等稟報致誤事機據琦善奏向榮專札催提吳全美船隻已飭

該員帶領二十五隻駛赴上游聽候調遣現在向策  
攻勦金陵如果必須水師協勦自應分撥前往但該  
船上駛亦必經由瓜州若先併力攻克瓜州再行節  
節進勦則船多勢壯更可得力該大臣等務須體察  
現在情形扼要布置合力兜擊斷不準稍存畛域之  
見

十四日

辛亥



上命軍機大臣傳諭勝保曰自六月二十八日接據勝保奏報後又逾半月並未續有奏報甚不可解豈連日以來竟未接仗耶朕聞高唐賊匪於七月初一日由南面竄出將吉林馬隊衝散又由南面竄至西南面兵勇多有傷亡該逆又復竄至勝保營後吉林馬隊亦被衝散帳房被賊用刀矛全行挑爛僅賸兩架聞逆匪於朝西等城牆用布挽做輓梯南城牆下穿

有地道一條其餘三門俱用土木爲壘僅留缺口一處以便出入據此情形勝保頓兵城下不但不能剋日進攻直並該逆出入亦不能防殊堪詫異該逆每撲一處馬隊總被衝散兵勇總有傷亡甚至大營之後亦被任意衝撲準備毫無可見所稱晝夜列隊悉力合圍者全係虛應故事又聞城中逆匪僅有三百餘名勝保以全力制之何難悉數殲滅軍心懈怠竟

至於此勝保近日豈復蹈驕矜故習耶著於接奉此  
旨後卽將連日情形據實覆奏不准稍有掩飾並卽  
督飭兵勇悉力進攻早圖克復儻仍前疏懈攻旣不  
能圍又不密老師糜餉坐令窮寇稽誅勝保等玩誤  
之罪斷不能曲爲原宥也

欽定勦平粵匪方略卷九十九 甲寅年

七月十五日

壬子

楊需奏言臣於七月初四日馳

抵湖北德安府初六日蒞任視事台湧帶兵現駐德安舒倫保帶兵同桂明並駐楊店佈克慎帶兵進駐應城都司劉富成帶兵分駐長江埠舒倫保後起官兵尙未前來節據探報賊匪分擾省城漢陽黃陂漢川等處而武昌府之蒲圻

咸甯武昌大冶興國黃岡府之黃岡麻城蘄水  
蘄州廣濟各州縣皆蔓延滋擾查楚北南境已  
多淪沒似當以保守北境爲先省城旣失司道  
各官無駐紮辦事之所擬請暫駐襄陽以資控  
制現在德安宜昌荊門等處甫經收復荊州屬  
邑亦多殘破漢水千里並無舟師控扼安陸城  
池爲另股賊匪竄踞經安襄鄖荆道羅遵殿派

員帶勇於六月初一日攻復是月二十八日又  
爲天門另股賊匪滋擾臣於七月初三日在應  
山途次接據京山縣稟函卽飛飭羅遵殿派兵  
往勦並調署總兵雙保帶領四川官兵一千五  
百名及都司劉富成帶兵就近會勦一面飛咨  
佈克慎緊防澗口一帶水陸要隘儻得安陸肅  
清則荆襄鞏固然後可圖進取再當與桂明佈

克慎雙保等妥議熟商一由孝感收黃陂一由  
天門取漢川一由漢水雇覓船隻裝載兵勇直  
達漢口三路並進以攻漢陽一面咨催塔齊布  
曾國藩等督帶礮船由岳州順流夾擊至黃陂  
麻城一路已飭黃安縣知縣許廣藻委署麻城  
縣知縣賀棨等趕緊聯絡義勇併力迅圖收復

奏八

上命軍機大臣傳諭楊需曰此時賊踞武昌以漢陽黃州爲犄角若不急圖進取則該逆日久盤踞攻克愈難桂明佈克慎台湧所帶之兵計已不少所駐之應城長江埠楊店皆已偏近漢江楊需既有三路進兵之議亟應趕緊前進著卽督飭桂明佈克慎台湧各帶官兵分道速剿至雙保一軍前據官文等奏已飭由沔陽直擣漢陽如已起程則該署總兵已就近抄



出漢川黃陂前路桂明等所帶官兵夾江並進愈不可緩儻因安陸土匪又令雙保折回北境誠恐益形迂緩該撫但當以速克武昌爲急不可稍涉遲疑舒倫保所帶官兵卽著該撫統帶前進後起之兵何以至今未到顯係沿途逗留卽著飛檄嚴催以資攻勦本日已明降諭旨將青廉交官文就地正法其隨同潰逃之涼州副都統魁玉已降旨革職與已革總兵

楊昌泗一併交楊需差委著楊需於該革員等到營時認真察看如不得力卽行據實嚴參從重治罪其所帶兵勇曾否已抵荊州卽著知照官文駱秉章嚴飭魁玉楊昌泗沿途妥爲約束令赴楊需軍營以備調遣崇綸及省城文武下落仍著詳查具奏

同日駱秉章奏言本月十四日接據提臣塔齊布函稱十一日有把總林從根等自湖北來營

稱鄂城失守巡撫青慶荊州副都統魁玉率領  
兵勇難民南來將次行抵新牆臣接閱之餘不  
勝駭異現在賊踞岳州常德府城之賊盡由西  
湖乘船赴岳本省北路防勦戒嚴之時鄂城文  
報久極真偽難知若奸匪冒稱北省兵勇乘機  
詭溷貽誤堪虞當委把總朱廷勳馳往偵察旋  
據撫臣青慶來函具言失守緣由並飢疲不堪

情狀囑臣速撥米二三百石暫資接濟意在取道速赴荊州臣一面趕緊籌備一面飛函青麐將各營兵勇及同行難民實數查明以便料理又委補用知府裕麟等迎往安撫截止北來兵勇毋許闖入省城以防奸匪溷跡並裝米八百石錢三千串運赴洞溪渡交青麐暫行散給卽紮營距省三十里白馬鋪地方收集潰卒按名

查點聽其分別隨征散遣再由南省酌撥口糧  
遄赴荊州以圖再振奏入

上命軍機大臣傳諭駱秉章塔齊布曾國藩曰岳州一  
郡爲南北衝要屢經逆衆竄踞此次該逆復由常德  
全數退竄該郡城外欲爲久踞之計塔齊布曾國藩  
水陸各軍皆爲所牽掣不能出湖東下圖攻武昌此  
時常德回竄之路固不可不防而岳州大股必須迅

圖勦辦以扼其吭所有添撥塔齊布之湘楚各勇數已不少曾國藩頭起師船亦經起行正可乘此聲勢迅籌水陸夾擊之策諒塔齊布與曾國藩同辦此事必能和衷商推計出萬全也青麀於武昌失守後退至長沙實屬偷生無恥本日已有旨將青麀交官文卽行正法並將魁玉革職與楊昌泗均交楊需察看差委所有青麀帶赴長沙之兵勇仍責令魁玉楊昌

澗管帶約束迅赴楊需軍營聽候調遣其湖北難民  
應如何安撫資遣之處並著該撫迅籌辦理毋令別  
滋事端

同日青麀奏言臣於三月十三日到巡撫任初  
六日武昌卽已缺餉每日每名祇放制錢二十  
文米一升如是者將及九十日其自正月十九  
日起至五月二十三日共獲大小勝仗八十餘

次自五月二十日後省中倉米無存萬分無法  
祇得放穀二十六日報到豹子海一帶賊船二  
千餘隻距武昌東南六十里臣卽密令楊昌泗  
統帶將弁分五路馳勦其頭隊傷斃賊匪四五  
十人二隊滿營槍斃身穿黃馬褂賊目一名又  
黃旗黃繖騎馬賊目二名惟三隊滿營因稽壘  
之中突遇埋伏以致陣亡官二員兵四十三名



撫標陣亡官二員兵十餘名後隊夾擊鏖戰三時之久共傷斃賊匪二百餘人全股皆退駕駛船隻而去將弁兵勇四千餘人無處覓食仍賴省中每人買給麪餅二箇以資餬口六月初一日賊紮營魯家港該處爲米糧出入必經之地此路一梗城內外即可斷炊經臣密遣楊昌泗並都統魁玉率領將弁連夜馳勦初二日我兵

正在連踏賊營五座之際乃省城對岸漢口之賊直撲塘角鷓鴣洲之賊直撲鮎魚套臣在武勝門督戰見塘角賊衆四撲四退不料城內蛇山以上黃鶴樓以下黃旗皆出內應紛起城外各營盤兵勇皆潰其出戰之將弁兵勇全在魯家港尙隔三十里之遙一轉瞬間省城萬不能守臣木應與城存亡以全臣節惟數十萬生靈

勢必皆爲賊有徒損

國威而添賊勢不得已倣古人移師就餉之法親率大隊一路攻擊於初四初七等日攻復咸甯蒲圻二縣又於初十日到桃林地方遇賊接仗殺斃百餘名臣本欲渡江前赴荊州惟江上無船萬不能渡祇得相機隨進隨勦徑赴長沙將兵勇紮在離城三十里之白馬鋪地方並飛函

湖南撫臣駱秉章就近撥米以救數萬生靈臣  
暫將兵勇休息三五日分別或留或撤並將積  
欠口糧分別路途遠近設法稍爲補給以免沿  
途滋事臣與都統魁玉楊昌泗等仍取道馳抵  
荊州一帶相機防勦奏入

上命軍機大臣傳諭官文曰本日據青磨由長沙發來  
奏報妄以移師就餉等詞飾其棄城而逃之罪披閱

之餘憤恨何極青磨以巡撫大員職任守土賊至旣不能嬰城固守迨省城失陷尙復忍恥偷生輾轉越境種種悖謬荒唐殊出情理之外朕權衡至再若不立正典刑無以肅軍律而昭炯戒著官文於接奉此旨後若青磨果至荊州卽著就地正法儻青磨繞越他處迅卽揀派道府大員嚴密迎提到荊由該將軍宣示諭旨卽將青磨正法不得稍有漏洩致稽顯戮

並著官文等遵奉疊降諭旨妥籌防守荆郡毋稍大意

上諭內閣曰前任湖北巡撫青麐自簡任封圻以來正當黃州漢陽賊匪充斥之際武昌兵單餉匱本屬實情朕以青麐在學政任內保守德安郡城念其勤勞畀以重任疊據奏報省垣布置屢次擊賊獲勝計八十餘日中困苦艱難所奏原無虛假朕方節次嚴催

各路援兵前赴武漢救應但以道途多阻未能迅速  
趕到青磨於六月初二日大股賊匪攻城時業已派  
魁玉楊昌泗帶兵連踏賊營五座苟能督率官兵感  
激衆心竭力鏖戰何至省城遽爾失陷即使嬰城固  
守坐待援師亦望解圍有日方當宥過敘功縱或力  
盡捐軀不失城亡與亡大節褒忠有典豈不心跡光  
明乃本日接到青磨奏報稱於武勝門督戰時見城

內黃旗皆出土匪內應兵勇潰散卒與魁玉楊昌泗  
擁衆遠避爲移師就餉之謀徑赴長沙直是棄城而  
逃曷勝痛恨儻青麀爲收復武昌計或就台湧軍營  
併力進取或從官文乞師前來帶罪圖功亦可爲之  
曲諒長沙則去武昌甚遠並非青麀所轄之地越境  
偷生何辭以辯若再加之寬典則疆吏守土之責幾  
成具文何以對死事諸臣耶所稱沿途攻勦擬抵荆



州皆是任意鋪張希圖掩飾與前奏不敢畏蕙巧避  
置城池人民於度外大相徑庭朕賞功罰罪一秉大  
公豈能以青麀前此尙有微勞稍從末減青麀著俟  
到荊州時交官文卽行傳旨正法中外臣民當知朕  
倚任青麀之念甚切而青麀喪心負恩自取罪戾國  
法具在豈能曲爲原解涼州副都統魁玉駐兵洪山  
賊由該處衝入咎無可免惟前赴長沙係由青麀率

同偕往且非守土之官罪止失律著卽革職與在籍  
已革總兵楊昌泗均交楊需軍營酌量差遣仍著隨  
時察看儘該革員等不知愧懼並查有臨陣退縮巧  
飾推諉情事卽一面據實奏聞一面以軍法從事

十六日

癸丑

和春福濟奏言准秦定三來函六月

三十日舒城逆匪分三路來撲每路三千人當  
派郝光甲鮑雲翥約同曹遠榮帶領兵勇分投

迎勦秦定三居中調度各兵勇奮力爭先斃賊多名該逆恃衆死拒並有黃衣騎馬賊目一名在前指畫把總吳大春揮兵直前將黃衣賊刺落馬下衝入賊隊被裏重圍登時陣亡我兵三面夾擊該逆紛紛敗逃兵勇追至連三橋該逆於營內並樹林中連開槍礮未能攻入將賊住房燒燬是日約斃賊匪千餘名初二日賊匪萬

餘先撲貴州官兵營盤經鮑雲翥督兵奮擊斃  
賊無數秦定三督率官兵連開槍礮轟斃甚多  
並擊斃騎馬黃衣賊首一名餘賊潰走其陝西  
兵並義勇營盤逆匪直前搶撲經郝光甲曹遠  
榮督率兵勇竭力攻擊各斃賊數十名均卽退  
走官兵追殺數里初三日賊匪數千人分路來  
撲秦定三飭令各兵開礮轟擊又斃賊三四百

名初五日該逆仍以數千人分撲秦定三督率  
郝光甲鮑雲翥等分投迎擊並先派兵勇赴西  
南面埋伏以備抄襲旋見三路賊隊各有騎馬  
黃衣賊一名在後由橫嶺直前來撲兵勇盡力  
攻擊伏兵齊出前後夾攻斃賊不計其數賊隊  
大敗約斃賊匪千名餘賊遁入林內查舒城逆  
匪以大股抗拒並將入城要隘築壘多處阻我

官兵進路訊據生擒賊匪供稱因被勦緊急經羅大綱帶領賊衆由金陵安慶桐城前來救援並解廬州之圍卽圖北竄等語秦定三由正陽關來舒僅帶貴州陝甘兵二千一百名此外本地紳團止曹遠榮所帶數百人尙可隨同進勦其六安州茅念劬所稟先後挑選義勇至今並未到舒合肥縣張靖所招團練現止千餘人因

經費不繼尙未隨戰是舒城兵力過單必須設  
法添撥兵勇查有總兵音德布管帶雲南四川  
兵開化勇共一千六百名近在西路應卽派往  
又福濟營內酌撥川勇四百名飭令趕緊起程  
統歸秦定三節制並將北路青州滿兵八百名  
令常清帶赴西路會勦貴州把總吳大春奮勇  
殺賊臨陣捐軀應請

旨飭部照例議卹

和春福濟又奏言據六安州知州茅念劬稟報  
逆匪由英山竄至霍山有攻撲六安之信查英  
霍緊接湖北蘄水已飛飭茅念劬趕緊招集鄉  
團會同署參將和寬竭力堵禦毋任闖入並飛  
咨秦定三就近量爲撥兵相助惟該逆旣至霍  
山誠恐窺伺北路急須加意嚴防秦定三已赴



舒城督勦正陽關僅劉玉豹帶兵數百名殊嫌單薄臣等再三籌計臨淮兵力稍厚刻下情形較緩已咨會袁甲三酌撥一千名馳赴正陽關駐紮該處爲北路門戶最關緊要臣等相隔太遠難以兼顧應請

旨飭令袁甲三就近督同劉玉豹等嚴密防堵以固要隘奏入

上命軍機大臣傳諭和春福濟袁甲三秦定三曰舒城  
逆匪屢次攻撲雖經秦定三督兵攻擊疊獲勝仗而  
該逆以大股抗拒並於八城要隘築壘阻我進路羅  
大綱復帶賊衆由金陵安慶桐城前來救援兼欲解  
廬州之圍以圖北竄秦定三兵力甚單和春等現派  
音德布帶雲南四川及開化兵勇一千六百名並撥  
川勇四百名均歸秦定三節制自應如此辦理音德

布現已革職仍責令管帶兵勇迅速前往交秦定三  
差委儻再不知奮勉卽著從嚴懲辦逆匪現由霍山  
攻撲六安正陽關僅劉玉豹帶兵數百名殊嫌單薄  
英霍一帶又與湖北蕪水毗連設該逆乘北路空虛  
肆行奔突爲害更鉅著秦定三察看緩急情形一面  
攻勦舒城仍應兼顧後路以杜逆匪北竄袁甲三現  
駐臨淮和春已咨調該處兵一千名馳赴正陽關著

袁甲三卽飭帶兵各員迅速前往隨時偵探賊情相機堵剿並嚴飭劉玉豹等實力堵禦毋稍大意和春福濟仍當察看西路情形如須再添兵力卽速撥往應援現在高唐連鎮逆匪尙未肅清若令南賊續行北竄朕惟該提督等是問

上又命軍機大臣傳諭琦善雷以誠曰本日據和春等奏大股賊匪由英山霍山竄至六安並因舒城攻剿

緊急賊衆由金陵桐城安慶前來接應是皖省勦賊情形極爲喫緊且各路派員防堵以及勸諭捐輸設法籌餉在在需人經理已革刑部侍郎雷以誠現在裏下河駐紮著琦善卽傳諭該革員迅速前赴安徽和春福濟軍營幫同辦理籌餉防堵各事宜其所帶裏下河募勇並經手事件著琦善另派得力幹員前往接辦

上諭內閣曰舒城逆匪疊被懲創正可乘勢進攻著秦  
定三督率各路兵勇迅圖克復毋稍遷延貴州把總  
吳大春奮勇殺賊臨陣捐軀深堪憫惜著交部照例  
議卹

和春福濟又奏言臣等因秦定三勦辦舒城逆  
匪賊衆兵單情形喫緊派令音德布帶領兵勇  
一千六百名趕緊馳往會勦乃該總兵竟以待

領口糧爲詞延不起程迨再三設湊發給二千兩並專文嚴催猶以銀少不能就道秦定三孤軍望援急如星火該總兵明知缺餉並不體念時艱向兵勇剴切開導實屬因循玩延相應請旨將雲南鶴麗鎮總兵音德布卽行革職仍留軍營隨同秦定三帶兵進剿以觀後效儻再稽遲卽行奏請以軍法從事奏入

上諭內閣曰雲南鶴麗鎮總兵音德布經和春福濟派  
令管帶兵勇馳往舒城與秦定三會剿輒敢藉詞稽  
留延不就道實屬不知緩急音德布著卽革職仍留  
軍營隨同秦定三帶兵進剿以觀後效如再不知奮  
勉卽著嚴叅治罪

和春福濟又奏言廬城逆匪因屢被懲創一味  
堅守臣等督飭官兵晝夜開礮轟擊七月初一



日傳令於初二日寅刻合力圍攻恐該逆避匿  
飭令各隊緩進先派守備江忠信帶領楚勇數  
百名於南門外誘敵俟其出巢圍剿突有賊匪  
三四千人自南門出楚勇迎擊珠克登楊青鶴  
音德布程智泉督帶兵勇續至三面夾攻約斃  
賊匪三四百名初六日令江忠濬程智泉帶領  
楚廣各勇先在得勝門外誘敵逆匪突出四五

千人各勇齊力迎勦音德布等旋即趕到臣和  
春督同吉順鄭魁士等帶領兵勇會合夾攻斃  
賊不計其數並擊死騎馬黃衣賊二名賊勢大  
潰兵勇追殺屍橫遍野敗賊入城堅伏不出我  
軍於午刻回營約斃賊匪七八百名初八日合  
肥縣在籍郎中李文安帶同本地鄉團千餘人  
前來臣等卽令隨同攻擊該逆堅守如故容再

聞

設法進剿奏入報

同日崇恩奏言臣於初六日抵省探聞連鎮逆匪時有潛竄之意武定防剿喫緊未敢稽延隨即於十一日抵武定府城查該府所屬之樂陵縣距連鎮僅百餘里與賊巢偏近實屬最要門戶去歲臣在武郡曾飭該縣署典史葉壽海在

彼團練甚爲認真 臣親往查看激勸以固民心  
至該府存城兵勇共有一千四百餘名合之紳  
民團練似尙足資捍禦 臣帶馬步隊三百餘名  
擬令權駐郡城以便隨宜調度又查連鎮之賊  
若欲與高唐合股則平原一路亦爲要隘 臣前  
飭督糧道姚錫華派勇二百名在德州境內交  
界平原之曹莊扼要防守聲勢可望聯絡茲復

札飭厲恩官派勇幹千把一人帶兵五十名在  
黃河涯曲陸店一帶駐紮偵探一聞北股有南  
竄確信卽行馳報以便兜擊其德州一路仍飭  
姚錫華等小心防範再臣前與勝保面訂以半  
月爲期仍回會剿是以全隊兵勇均駐高唐儻  
連鎮賊匪日內剿滅事機略緩臣卽仍回高唐  
與勝保商辦一切奏入

上命軍機大臣傳諭崇恩曰據奏馳抵武定布置大概  
情形高唐攻勦與武定設防均關緊要該撫所稱平  
原樂陵兩路爲扼賊南竄要隘已有厲恩官等兵勇  
並典史葉壽海所辦聯莊團練似足以資保衛而該  
撫全隊兵勇又皆留在高唐正須兼顧妥籌庶不致  
徒勞往返著崇恩體察情形如果武定之防實在可  
恃卽仍赴高唐督兵協勦儘該郡防堵尙須親身督

辦卽留武定將防務布置嚴密再往高唐崇恩於接  
奉此旨後總期酌度緩急確有把握不得僕僕道途  
空有履勘之名於督勦籌防轉致兩無裨益

同日陝西巡撫王慶雲奏言據豐伸函稱襄樊  
爲陝豫保障非重兵不足以壯聲威現在商南  
防兵僅二千一百餘名擬將榆林兵二百名仍  
留防所其一千九百餘名於初十前後分爲四

起派委曾經出兵之遊擊吳士珍等管帶由荆  
子關水路赴襄等語臣近接駐楚委員候補知  
縣楊光澍探報並督糧道陳景亮稟稱逆黨自  
攻陷武昌其德安安陸一帶股匪全行下竄盤  
踞武漢之間目前楚北上游雖稱安靜而賊蹤  
飄忽靡常襄陽南北咽喉秦豫門戶此地安則  
西北皆安與其秦豫處處設兵而防不勝防莫



如移兵前進可以保全大局此誠今日之至計也且兵合則力厚分則力單必移各處防兵與襄郡兵勇互爲犄角而後可期得力惜商雜防兵祇有此數現經臣復調駐省之甘肅兵一千名酌量移紮商南兼備添調查商南至荆子關甚近荆子關水路至襄約五百餘里已由陳景亮札飭浙川光化等廳縣速備船隻俾利軍行

其應需軍餉飭據藩司再籌撥銀一萬二千兩  
連現帶三千兩共一萬五千兩足資兩月支放  
至商南與豫省毗連隘口仍令留防兵二百名  
在梳洗樓界牌兩處設卡巡防其民間團練經  
該縣知縣李祝齡勸諭聯絡亦頗得力卽由陳  
景亮督率文武官紳認真辦理奏入報

十七日

甲寅

僧格林沁奏言查現在賊情已離米

麥漸缺馬草尤爲短少兩岸套隄竣工擬將圍  
隄衝決之處補築東面賊巢水深二三尺至四  
五尺不等再將決口補築俟水勢益深該逆卽  
難容止惟河西地勢較高現因下游河水太消  
不能浸灌恐該逆蟻聚西岸然究屬一隅之地  
設由西岸進攻或易得手臣惟有體察情形籌

度進取不敢稍事遷延護軍統領王明侍衛薩  
克慎分起馳抵大營經臣飭令帶兵在連鎮南  
面屯紮新到之兵跋涉勞頓一面暫令休息以  
蓄精銳一面嚴督統帶之員詳加教導藉收生  
力之效奏入

上諭曰朕日盼捷音甚切汝豈不知此次所奏各情尙  
係毫無把握朕實不解功罪惟汝自取朕亦無可再

諭矣

二十日丁巳英桂奏言臣於七月初七日馳抵信

陽連日查看三關情形原派兵勇均於扼要處所紮營當卽督飭各帶兵官勤加操練並將隨帶兵勇添撥駐守以壯聲威現在湖北安陸府城復爲賊擾襄陽情形較緊川陝防兵恐一時尙未趕到豫省南陽一帶尤當思患豫防現飭

聞

署南陽鎮臣崇安由信陽星夜馳回仍於新野  
原紮營盤之水臺地方激勵士卒加意防堵臣  
俟調撥隨營兵勇到齊卽擬先赴光州一帶往  
來調度奏入報

二十一日戊午向榮奏言查紅單船五十隻前於

六月二十二日行抵焦山風逆未能卽上經臣

先後函商琦善並屢札帶船將弁迅速攻上金山駛赴瓜儀以便分提前進緣自艇船扼駐六合江面江鎮賊已不通而上游逆艘千百來去頻仍亟應趕緊布置扼剿因復咨會琦善一面指調吳全美船二十五隻迅圖進擊一面力籌攻勦金陵朝夕出隊並飭派出游兵嚴堵各路竄逸六月杪與本月初二三等日賊眾到善橋

油坊橋一帶搶掠經游兵會同地方團勇埋伏  
燒劫前後殺賊百餘人生擒楚粵長髮十五人  
解營正法臣復派令精細間諜入城張貼告示  
解散各處脅從曉諭各城附近居民移出十里  
之外免爲賊擄並防奸民接濟資賊連日探報  
該逆在夾江內趕紮極大木籬上列木櫃爲牆  
內實以棉前後用牛挽水輪運動又於沿江增



築礮臺密排大礮並造攔江鐵鎖與火攻船隻  
欲以拒禦船艇阻我上攻臣已函致各船鎮將  
隨時加意防範乘賊計未備之先我船一至卽  
可直上扼勦現准琦善來咨紅單船業於初二  
日駛至瓜州之上已分提吳全美所帶各船前  
進吳全美到營後面授機宜一俟轉有東風卽  
督師船打過金陵先掃沿江賊艦然後徑赴太

平一帶扼駐蕪湖往來勦洗惟念該逆自兩湖  
至江皖裹脅百姓甚衆沿途搶船極多紅單船  
止二十五隻不敷堵擊查金陵下游各項師艇  
共九十餘隻一面咨商琦善酌配師艇二隻委  
鎮將管帶協同上勦一面飭六合江浦派撥水  
勇划船藉張聲勢並擬到蕪太內河招募小船  
二三百隻添派兵勇截殺登岸逸賊並以保護

糧運但既扼截長江則陸路倍宜嚴密布置浦  
口緊在對江相距上下游師艇較遠賊船一日  
未靖則北竄一日堪虞已飭該處文武加意防  
範昨接余萬清呈報瓜州賊匪意欲歸併鎮城  
並於沿江十三門一帶築造石城賊黨日增亟  
應嚴防內竄現在趕緊設法相機轟擊所有西  
路沿江之石馬廟高資等處已嚴飭團練局董

堵守並會同游兵出哨梭巡又以霜勇五百名  
移屯丹陽後路乘紅單船上擊之時卽出隊攻  
城以分賊勢臣已函飭余萬清加意勦防力籌  
克復一面令吳全美趕緊督船上駛俟其攻上  
金陵如何勦辦再行隨時具奏以慰

聖懷奏入

上命軍機大臣傳諭琦善向榮曰向榮所奏各情自係

因上游緊要欲將此項船隻徑赴太平一帶扼駐蕪湖爲往來勦洗之計惟分提二十五隻卽再配師艇二隻爲數尙不甚多是否足資堵擊且該逆在夾江趕紮木簃並增築礮臺及火攻船隻是逆匪已有準備此項紅單船隻該大臣等惟當扼要攻勦務令上下游聲息相通互爲策應斷不可稍分畛域致誤事機該逆詭計百出尤應嚴飭統帶水師各員加意嚴

防逆匪因瓜州難守陸續竄往鎮江築造石城此時  
瓜州賊情究竟如何著琦善督飭將弁迅攻瓜州仍  
嚴防該逆竄路毋令與鎮江之匪合而爲一並著向  
榮嚴飭余萬清迅圖克復不准再事遷延師船旣扼  
截江面則陸路防勦更宜嚴密布置浦口一帶與上  
下游師船是否聯絡恐該逆由此路乘虛北竄該大  
臣等務須統籌全局迅掃賊氛

向榮又奏言管帶湖南官兵副將傅振邦奉

旨著理徐州鎮總兵自應遵飭赴任惟現在陸路喫緊  
湖南官兵乏員接管傅振邦急切難以抽身仰  
懇

天恩將傅振邦暫留江甯軍營以資統帶俟楚兵有人  
接管卽行飭赴署任奏入

上從之

同日陳啟邁奏言查武甯縣被匪竄擾經臣派撥兵勇馳往勦辦茲據知府史致諤遊擊常海等稟報查探武甯城內逆匪約四千人該縣城本低薄賊於城上加築土牆密排槍礮城外北門高岡暨南西二門俱紮賊營勢成犄角惟東面可以進攻初七至十七等日五次進攻雖有斬擒而近城槍礮如雨急切難下十九日先派



前湖南邵陽縣知縣劉馨朝等管帶兵勇五百  
名分投設伏賊營之後其餘兵勇列爲四隊分  
路進攻參將德保史致諤常海督帶兵勇往來  
策應該逆突出二千有餘向前迎敵常海親督  
兵勇直擊賊隊衆軍左右衝突自己至未鏖戰  
三時賊始敗竄我兵乘勝追勦伏兵四起首尾  
夾擊斃賊甚多常海督兵縱火焚燬北門賊營

奪占高岡安設槍礮擊斃城上賊匪多名卽從  
東北二門上城餘匪由西門奔逸我兵當卽收  
復縣城並將南西二面賊營一律踏毀該匪四  
散奔逃多被劉馨朝等伏兵所殺統計是役沿  
途擊斬及連日傷斃賊匪不下千餘其追徧落  
河淹斃及翻山跌斃者不可數計陸續生擒匪  
徒冷紹芒等共二百零三名於訊明後正法奪

獲槍礮器械無算正在籌辦善後事宜續得探  
報敗竄餘匪復經糾合在橫路等處屯聚並聲  
稱往招武昌大夥賊衆欲圖報復臣現檄調遊  
擊富克金泰帶勇數百名由德安前往會剿南  
昌府知府史致謬失守屬縣例應議處此次克  
復迅速可否准其功過相抵出自

天恩再臬司惲光宸在潯布置尙屬周妥因聞武甯業

已克復毋須再往督辦已於六月二十二日回  
任合併陳明奏入

上命軍機大臣傳諭陳啟邁曰此次攻克武甯斃賊無  
數辦理尙屬得手惟敗竄逆衆仍糾合餘匪在橫路  
等處屯聚並有往招武昌賊夥欲圖報復之說該撫  
已檄調遊擊富克金泰等帶勇由德安前往會剿著  
卽嚴飭史致諤常海等乘勢撲滅此股逆黨本係由

九江關入滋擾是九江爲該逆來路必須堵截臬司  
輝光宸前赴九江布置是否周妥如仍須大員在潯  
督辦則該臬司不必急急回省移須妥籌兼顧勿稍  
大意義甯一州緊連楚北所屬之梁江蒲口等處均  
係由楚入江要隘自趙如勝等焚燬港口賊巢之後  
近日如何接仗有無賊蹤屯踞亦應飛飭帶兵官弁  
趕緊殲除武昌黃州各州縣皆密邇江西湖南岳州

一帶亦皆犬牙相錯陳啟邁務當外殄寇氛內除土匪毋得專顧一隅稍有疏懈

上諭內閣曰此次收復武甯縣城辦理尙爲迅速該撫仍當嚴飭該文武等搜勦逸匪勿留餘孽南昌府知府史致諤例有應得處分惟勦捕出力克復縣城功過尙足相抵著加恩免其議處